

Premié i venjidores del concors leterèr

Gran partezipazion a la scomenzadiva per la conties più beles endrezèda dai Volontadives del lengaz



N muie de scolees, ma ence jent grana, à tout sù la endesfida de scriver na contia per fascian.

Letradura - L'à abù dassen n gran suzess la pruma edizion del concors "Na contia per Nadèl" endrezà dal grop di Volontadives del lengaz. N suzess de partezipazion e de aprijament che à confermà che col ladin se pel ge dèr ouc ai pensieres, ai sentimenc, a la conties, a la reflacions, a chela più sciantives, che vegn da n fat de cronaca, o dai recorc de cèsa, o da evenc personèi. Passa 120 scric l'é ruà ite e i Volontadives à abù so bel da fèr a se i lejer fora duc chenc e a dezider coluns che l'era i più bie. No à tout pèrt demò scolees, per sie cont o con duta la clasc, ma ence jent grana e mingol più de età, segn che scriver piès e se sproèr col ladin amò de più. La sodesfazions e l'avepai a duc chi che à tout pèrt, ence ai insegnanc

che à lurà te clas con si scolees, é stac uzé fora da la coordenadora Sabrina Rasom en ocajon de la premiazion del concors stata en domenica domesdi te sala grana de l'Istitut Ladin "majon di fascegn".

Sabrina à spiegà chi che l'é i Volontadives del lengaz: jent che à a cher l'lengaz ladin, che se troa n'outa al meis per rejonèr ensema de desvaliva robes, con chela de tegnir sù noscia rejonèda e proèr a la slarièr fora ence a jent che no é fascèna. N grop avert a duc chi che vel baratèr esperienzes, idees, la pascion e l'amor per l'ladin. L'idea de chest concors é vegnuda da Ermanno Winterle aldò de na bela scomenzadiva che l'Comun de Poza aea envià via ti egn '80 e che dapò é jita a se perder. E segur no se se aessa spetà na partezipazion sci grana. Tòc en

rima e etres en prosa, tòc che conta de tempes passé, de fac sozedui e de emozions vivudes, e vèlch un l'é dassen n muie bel e comovent descheche se à podù sentir da vèlch un di autores enstesc, che canche i à let jù sie scric ge à fat vegnir la lègremes a più che na persona, te na sala piena e resa. L'envit a seghitèr a scriver per ladin l'é stat uzà fora tant da la Procuradora Cristina Donei che da la Sorastanta Mirella Florian, doi persones leèdes a la scola, ensema ai complimenc ai Volontadives e a duc chi che à tout pèrt al concors. Dapò l'é stat l moment de la premiazion, viventèda da la musega de doi arlieves de la scola de musega Il Pentagramma, Giacomo a la tromba e Christian a la tastiera, che ensema al maester Stefano

Lazzer i à sonà dotrei tòc gustègoi e da snait. Sabrina Rasom à sottolineà che duc i scric é n muie bie e originèi e per chesta rejon, te vèlch cajo, l'é stat cernù de meter ti prumes posé più che un col valif merit. "No aon volù fèr na classifica - l'à jontà - e per chest duc chi d'ò l'èz é stac conscidré sul valif sciaier." I scric é stac valuté aldò del lengaz, de l'originalità e del contegnù. Per endèna l'é stat avert demò la soracueres di prumes trei classifiche, spartii anter la categories de rimes e conties, mané ite da jent grana, scola auta, scola mesèna e populèra, ma n muie l'é amò i scric che merita segur na segnalazion. Duc i tòc aboncont vegnarà regoec te na publicazion che ge vegnarà manèda a duta la families enjontèda al numer da Nadèl del

boletin del Comun general de Fascia. Paroles de aprijament é ruèdes ence da Rut Bernardi, scritora e poeta, che la é d'ò che la fèsc na enrescida su la lettradura ladina: "L'é emportant engaissèr la jent, soraldut i bec, a scriver per ladin. A nos no i ne l'à mai insegnà, ajache canche eraane picoi scrivaane demò per talian o todesch e donca l'é segur bel che vegne endrezà chesta scomenzadives che envia a se dèr jù co la lettradura ladina."

Da uzèr fora che anter i venjidores l'é ence persones che no é fascènes, desche Nicola Parzian e Marianna Mizzoni, che à scric dassen de bie tòc, te n fascian rich e sciantif. A ic e a duc chi che à tout pèrt a chesta pruma edizion del concors i più bie complimenc! (mci)

I Volontadives del lengaz se à dat jù n muie per chest bel concors.